

Partida socialdemocratica cun Martin Jäger

La Partisa socialdemocratica ha lantschà a San Bernardino il cumbat electoral per il svilup cun quità

■ (cp) Sonda ha gi lieu a San Bernardino il di da partida ordinari da la ps dal Grischun. Martin Jäger è puspè vegnì nominà unanimamain per il cussegl governativ. En ses emprim temp d'uffizi ha el prendì a mauns curaschusamain er dossiers difficils e mussà ch'el sa sviluppar impurtantas innovaziuns da leschas sco la lescha da scola e da perscrutaziun. Ils delegads da partida han plinavant approvà ina resoluziun partenent la politica da linguas grischuna che vul rinforzar la trilinguitad sco element impurtant per in svilup cun quità dal Grischun.

Curaschi da sa far valair

En ses pled ha il president da partida Jon Pult punctuà ch'il Grischun dovria in svilup cun quità. Quai muntia perspectives per la piazza da lavur, la tgira da las cuntradas sco er la promoziun da nossa cultura multifara. Tant pli impurtanta saja ina ferma ps che ha il curaschi da sa far valair u schizunt far resistenza envers interess particulars. Be uschia saja in svilup cun quità pussaivel. En la legislatura che va a fin haja la ps cumprovà quel curaschi per exempel cun dumagnar il gigantissem en connex cun l'olimpiada e cun sfurzar la Repower ad in avegnir senza cotgla. Ussa stoppia la partida s'engaschar per in'economia sociala ed ecologica, per investiziuns en la cultura ed il sport e per dapli trasparenza en la politica grischuna. Cun quel intent vegnia la ps a sa preschentar a las elecziuns dals 18 da matg.

Martin Jäger fa bilantscha

Il cusseglier governativ Martin Jäger ha declerà en ses pled ch'i dovria, en temps economicamain difficils e malsegirs per il Grischun, cun cassas publicas adina pli



La Partida socialdemocratica ha lantschà il cumbat electoral. FOTO R. CANAL

vidas, en la regenza grischuna uss ed en avegnir er la ps. La ps stettia per ulivaziun, per l'idea dal partenadi social en economia e politica e per ina politica per tuts e na be per paucs. Dapi sia entrada en uffizi il schaner 2011 haja el vivì la politica da partenadi e las valurs svizras da concordanza. Ins saja sco socialdemocrat en l'executiva na be per manar ses departament.

Ins vegnia elegi en la regenza per far entrar il punct da vista da la ps. El saja dal tutfatg cuntent cun la bilantscha dals davos trais onns. En spezial saja el losch sin la nova lescha da scola che signifitgia in grond pass per la scola populara grischuna. En ils proxims onns spetgian grondas sfidas pertutgant la trilinguitad e la pasch linguistica en il Gri-

schun. En quest connex saja l'iniziativa «Ina suletta lingua en scola primara» in prighel considerabel.

Quell'iniziativa saja facticamain in'atgata sin la lingua taliana che stoppia vegnir parada. Tant pli impurtant saja però er da promover ils proxims onns la pasch linguistica e la solidaritad tranter las communitads linguisticas. Quai è ina dumonda en la quala Martin Jäger lavuria stretgamain ensemen cun il cusseglier governativ tessinais da la ps Manuele Bertoli, sco che lez ha punctuà en ses pled ospitant davant ils delegads da la ps dal Grischun.

Resoluziun pertutgant la politica linguistica

En quest senn han ils delegads da la ps

grischuna approvà ina resoluziun pertutgant la politica linguistica dal Grischun. En quella punctuescha la ps en spezial che il tractament equal da las trais linguas chantunales cun ils medems dretgs tenor la constituiun: tudestg, rumantsch e talian stoppia vegnir realisà. Correspundentamain saja l'iniziativa «Ina suletta lingua en scola primara» da refusar. Plinavant pretenda la ps en sia resoluziun da promover la purschida da scolas bilinguas, da garantir la coordinaziun interchantunala e che noss chantun stoppia sa posiziunar sco regiun da model pertutgant la plurilinguitad.

Finalmain han ils delegads reelegi tut ils gremis da la partida. Jon Pult resta president e Silvia Modalek-Roth vicepresidenta da la ps Grischun.